



## Extrait de la revue **Singuliers** du 4<sup>ème</sup> trimestre 2014

Revue des parlers romans de la province de Luxembourg

Editeur responsable: P. Otjacques, rue de la Hette 19 - 6840 Neufchâteau

**Rubrique : Contes èt racontroûles d'Ârdène**

### **Lu nwar ètang d' Bilôde** (4<sup>ème</sup> partie)

Emile PÈCHEUR (wallon de Saint-Hubert)

A pôrtî du mwès d' déçambe 1789, l' abîe va conuche one série d' maleûrs, du tourmint, du brimâdes, du mwêjes passes. Lu 23 d' déçambe, pus d' mile révolucionêres do Brabant moussant dins l' moustî come dins leû môjon. Eûreûsmint, l'Abé k' èst conu po rézistant al révolucion n' èst nin la, tote lu trope èt leûs tchfôs s' instalant dins l'abîe.

On djoû al nut', dins lu staminèt dol roûe Sint Djîe, lu ci k' avèt come ansègne lu grande chope du bîre dèssinéye so l' façade, lès Brabançons fins ronds èt mwârts sôns su minint come tos lès sôndârs an payis conkis cand i sont dustchin.nès. Wôtî Poudevigne su trovèt la, al mwêje place o mwês momint : one lame brabançone pièrdûe nu rate nin Wôtî ki tume d' on plin cômpe come one masse. One pîce d' ardjint tume foû du s' dwate mwin so l' plantchî, lu rante do mwès, lu pris du s' silance.

Lu payis èst asteûre rimpli d' bandits, du cômpeûs d' boûze, du piyeûs. O mwès d' avri 1792, lu France déclare lu guère a l' Ôtriche. On raconte jusk' a Sint Yubêrt ku lès Francès massacrant dès çantin.nes du ritches aristocrates èt ki brûlant lès tchêstês èt lès-èglîjes. Orval brûle an 1793. L' arméye révolucionêre dol Mozèle prend Sint Yubêrt lu dimagne 25 du mêy an 1794.

L'Abé Nicolas Spirlèt, qui tint avou lès-Ôtrichyins, su sint menacè ; i kite l' abîe al dèrin.ne mîminute, il irè a tchfô jusk' a Monschau (Montjoie) môgré sès sèptante noûve ans. Il arive a bout, malôde, o couvant dès Cordeliers. I va i moru lu 16 do mwès d' sètambe ki sît. Lu dèrin Abé è moru, sins rin dire so l' cwârps du sint Yubêrt.

Lu dij' do mwès d' octômbre 1797, l' abîe èst vindûe avou totes sès dèpandances. C' èst l' fin d' l' istwâre.

Nin t't-a fêt. Lu pus djon.ne èt dèrin mwane du l' abîe d' Sint Yubêrt, Dom Stéfane Neûman, è moru lu vint' deûs do mwès d' aous' an 1834 a Beûvanje, o Grand Duché do Lucsambourg. Il avèt probablumint rcî lès dèrin.nes confidances da Dom Spirlèt. Il a todi dit k' i n' savèt nin d' où ç' ku l' cwârps èstèt, mès k' i savèt bin k' il ègzistèt.

Ôdjourdu, lès bwès ont rpris leû dwat a Bilôde. I gn-a pus k' on fond d' valéye plantè d' rézineûs èt kékes traces dol digue. On raconte k' èle s' a kchèrè après 1850, bin lontins don après l' mwârt du Wôtî Poudevigne, lu bracnî, du Dom Spirlèt èt min.me du Dom Stéfane Neûman. Lès fâves èt lès istwâres ki fint peûr nu sont pus k' dès léjandes ou dès contes probâbes ou « iconoclasses ». Cwa ku, moton ?